

habet caput, unum Principem, cui omnes in eo parent. Hunc Rectorem vocant, cuius officium est, jus dicere, privilegia tueri, & maleficia reos scholasticis poenis afficere. Cum in publicum prodit, ante eum praecedit Accensus, quem Bedellum, recepto illic vocabulo, vocant, sequuntur famuli. Quantum autem honoris huic dignitati habeatur, hinc apparet, quod Consules, Magistratus & clarissimi quique viri, denique omnium dignitatum gradus, Academiae Principi assurgant, & decedant e via. Exeunti ad comitia, quae certis anni temporibus indici solent, plures Accensi anteambulant, singuli manu auratum gestantes baculum, insignia honoris amplissimi. Sunt & alia quaedam Lovanii non indigna spectatu loca; Xenodochium dotatum amplissime, ubi nunquam non assistunt aegrotis mulierculae solatiis refoventes singulos, atque adportantes, quod cuique e valetudine esse confiterit. Est & alio loco digna Duce, digna Principe domus, quam extruendam curavit summus Pontifex Adrianus Sextus, cum adhuc in minoribus ageret. Intra moenia visitur & coenobium Carthusianorum, loco ab omni tumultu, ab omni frequentia semoto, ita ut nec eremi solitudinem in urbe magnopere desiderarent monachi. Hoc aedificio nil ex ea familia vidisse se quicquam splendidius ingenue fatentur exteri. Haecenus ille. Habet etiam Lovanium Collegium Societatis Iesu olim inchoatum ab Adriano Adriani, Antverpiano, anno salutis 1555. Huic D. Elias Schore, concilio Brabantiae a secretis, vir bonus, & ob pietatem ac maximam in pauperes largitatem, aeterna memoria dignissimus, amplas aedes donavit, & post hunc Gualterus Runselius, D. Petri Canonicus, S. Theologiae Licentiatus, itidem suas pari liberalitate addidit. Sed inter virorum coenobia maxime emicant Dominicani, & ab his brachio fluminis divisi Franciscani; ubi columnae appensa sunt icon & epitaphium I. Lipsii, quod sibi ipse scripsit & poni mandavit

CIO IO CIV, 3 Id. Febr.

Quis haec sepultus, quæris? ipse edisseram.
Nuper loquutus & stilo & lingua fui;

Nunc alteri licebit. ego sum Lipsius:
Cui literæ dant nomen & tuus favor.
Sed nomen ipse abivi; abibit hoc quoque;
Et nil hic orbis, quod perennet, possidet.
Vis altiore voce me tecum loqui?
Humana cuncta fumus, umbra, vanitas,
Et scenæ imago, & verbo ut absolvā, NIHIL.

Extremum hoc te alloquor:
Æternum ut gaudeam, tu apprecare.

Inter Politica aedificia Curia commendatur, tota e secto per artem lapide, figuris & emblematis varie ornata. Magnitudinem justam habet, symmetriam bellissimam: insigne est majorum elegantiae vel opulentiae monumentum. Habes hic etiam Arcem sive Burgum, olim Comitum sedem; in qua agebant ob puriorem aërem & prospectum circum pulcherrimum. Haec inter quamplurimos exteros principes Carolus V, puer cum sororibus educatus. Reliqua urbis opera sunt, Fora rerum venalium IX; *Mole fluviales* XVI; *Via urbem secantes* mediam XII; *plateae laterales* CXL; *Pontes lapidei* XVI; *Fontes publici* I V. His accedunt *Croijorum, Schoon-Vorsiorum, Nassoviorum, & Bergensium*, Principum palatia.

Externa urbis praecipua haec sunt: *Fossae latae*, profundae, atque ex saepe per vivum silicem, aut scruposam terram percussae. *Muri lateritio pulchro opere, & sectis deinde lapidibus albis, magnisque, interstincti aut tecti*: iidem validis fundamentis ab ima fossaeducti; sic ut tertia operis pars vix in aspectum veniat. *Turres* eximii operis in moenibus habet LII, *Propugnacula & moles aggesta terra consolidatas* XII, *Pontes sublicos* XVI, *Portas* XI, e candenti lapide; inter quas spectabili opere visuntur haec: *Bruxellensis, Mechliniensis, Hasbanica, Diestenfis, Parcensis*: nomina a locis quo ducunt habent. dicuntur alias; *Banchensis, Montana, Thenensis, Flierbacensis*. accedunt his *Vinearum & Heberlensis*; illa a vinearum, ista ab hortorum in suburbano frequentia nuncupata. *Iobbenfis* a sacello D. Iobi in *Wesemalia*, alias *Emissitia* dicta, quod illac aqua emittatur.

Structura
publica.